

Coach Hulandes, Sarina Wiegman nombra miho coach den futbol femenino

(NLTimes) – Coach Hulandes, Sarina Wiegman a ser nombra e miho coach di futbol femenino na mundo na e gala di Ballon d'Or na Paris dialuna, ricibiendo e trofeo Johan Cruyff.

Wiegman, 55, a ricibi e honor despues di lidera Inglatera na su di dos Campeonato Europeo consecutivo ultimo berano. “E ta extra special cu e premio aki ta nombra pa Johan Cruyff. El a lucha pa

asina tur mucha por hunga futbol. Laga nos sigui conecta a traves di nos wega,” el a bisa segun NOS.

Renée Slegers, kende a gana Champions League cu club Ingles, Arsenal, tambe tabata entre e nominadonan pa coach di año femenino. E no a ricibi e premio individual, pero Arsenal a gana Club femenino di Año.

E premionan top individual di Ballon d'Or a bay na Ous-



mane Dembele, 28, di Paris Saint-Germain, y Aitana Bonmati, 27, di FC Barce-

lona. Dembele a bira e di dos Frances e siglo aki pa gana despues di anota 33 gol den

un temporada. Bonmati a sigura su di tres Ballon d'Or consecutivo, superando compañero di team, Alexia Putellas como e hungador femenino mas decora.

Den categoria di homber, Luis Enrique di Paris Saint-Germain a gana riba Arne Slot di Liverpool. Hungadornan Hulandes, Denzel Dumfries y Virgil van Dijk tambe tabata den e shortlist di 30 nomber pa Ballon d'Or, kedando na di 25 y 28 lugar.

Corte na Trinidad ta blokea extradicion di ex-vice presidente di FIFA na Merca

(AP) — Ex-vice-presidente di FIFA, Jack Warner a gana un bataya di un decada largo den corte ayera contra su extradicion na Merca pa enfrenta cargo di corrupcion den un scandal involucrando e cuerpo gobernante di futbol.

Corte di Trinidad y Tobago permanentemente a stop procedura di extradicion contra Warner, kende ta enfrenta cargonan di crimen organisa y soborno na Merca.

Warner tabata un di 14 persona nombra den un acusacion di 47 cargo pa autoridadnan Mericano na mei 2015. E tabata bringando extradicion desde esey.

Su pelea a yega hasta e Comité Judicial pa Privy Council na Londres, cu ta fungi como e corte supremo di Trinidad y Tobago. Na november 2022, e corte na Londres a rechasa e apelacion di Warner contra extradicion, efectivamente habriendo caminda pa e ser

manda pa Merca.

Sinembargo, dia 12 di september, abogadonan di defensa di Warner a argumenta cu no tin acuerdo formal di extradicion entre Trinidad y Tobago y Merca. E abogadonan a bisa cu un acuerdo asina ta rekeri pa extradicion di Warner.

Un abogado pa e estado, kende recientemente a tuma e caso, no a oponer e argumento.



Despues di e veredicto, Warner a bisa AP cu e ta sinti cu husticia a tuma lugar. “Mi nunca lo por haya back e rep-

utacion perdi, loke a pasa cu mi,” Warner a bisa. “Mi bida awo por cuminsa di nobo, pero ta 10 año laat.”

Organisacion Caballista Arubano celebrando 40 año di existencia

Na comienso di decada '80 tabata reina un deseo entre caballistanan pa un cambio den e mundo equino. Caballistanan tabata den busca di un organisacion dinamico cu por a crea mas actividad y traha riba un base mas amplio pa e desaroyo di cabaynan di paso den su sentido mas amplio.

E organisacion existente no tabata activo y esnan den e directiva tabata den desacuerdo riba e rumbo cu e asociacion mester a tuma. Den di dos mitar di año 1982 un grupo di caballista a tuma accion pa trece un cambio y nan a desea pa haci esey mediante un federacion nobo cu por yena e bashi cu nan tabata sinti. E grupo aki a acerca Tom Pietersz pa lidera e cambio.

Aki ta e momento cu oficialmente “Organizacion Caballista Arubano” a mira luz. Tom Pietersz a keda eligi como e prome president, cu ta e puesto cu el a ocupa pa e siguiente 10 año.



E team di miembronan fundador di e prome directiva a keda completa pa Enid Arends, Nelson Richardson, Oscar Werleman, Lucho Claro, Sonny Salas, q.e.p.d. y Leonard Peterson.

E prome competencia organisa pa OCA a tuma lugar na April 1983. OCA a hunga un rol visionario y conciliador den e mundo di cabay, treciendo e caballistanan hunto pa sinti nan mes na cas cu un variacion di actividad, cu tabata varia di cabalgata, competencia y hasta careda di cabay.

Un logro importante pa OCA tabata e registro di OCA con-

hunto cu Fedequinas, cual tabata un logro di president Alex Cybul, caminda prome OCA tabata conta cu un registro di ehemplar cu tabata inclui tur informacion caba, incluyendo microchip, e union cu Fedequinas a nifica cu OCA tin un registro cu ta wordo reconoci tur caminda, cu DNA di e cabaynan di Aruba. E proceso aki no tabata facil y a tuma su tempo, y ainda ta un proceso cu tin su tardansa, pero atrobe tin luz na horizonte pa e proceso aki.

Otro logro importante tabata cu aunke OCA tabata existi pa año, nunca esaki a wordo



formalisa, te na anja 2020 caminda presidente Myron Wever a finalisa esaki na Notaris Johnson. Esaki a haci cu OCA por a wordo inscribi na Camara di Comercio como un stichting cu a haci e petition pa sponsorship y demas ayudo mas facil.

Den organisacion di competencianan OCA a conoce 3 pick. E prome biaha tabata e binimento di un DC-8 yen di cabaynan di Criadero Lady Di. E segundo tabata e Mundialito y e tercer tabata e celebracion di 25 año di OCA ora cu mas di 10 mil hende a bishita e feria di 3 dia. Aruba

por ta orguyoso di e logronan local y internacional di su glorioso “Organizacion Caballista Arubano”. Su serie di competencianan internacional “Interpaso”, cu a inicia na 1986 a bira mundialmente conoci. Den su transcurso di 40 año OCA a conoce 11 president oficialmente eligi y nan ta Tom Pietersz, Camilo Muyale, Alex Mansur, Inca Boye, Juan Zuleta, Gregory Oduber, Alex Cybul, Brigitte Werleman, Arnold Martinus, Myron Wever y Jemina Martis.

Skirbi pa Tom Pietersz & Brigitte Werleman